

三崖公传

重公，字子重，宏祖之后，登正德戊辰进士，对策力诋时政，读卷官畏祸不敢上，抑置二甲，授刑部主事，历员外郎中。乾清宫灾，应诏陈言五事，皆人所难言。逆瑾柄国，会其兄死，百官皆吊，重独不往。瑾败，而其余党钱宁、张锐诬逮缙绅，前后相踵。重于其中出死力相争，即诏旨切责不为动。锐不胜愤，以他事下廷尉，久之索不得，竟还职，擢四川按察司副史，提督学校，转浙江按察使，未上，擢都察院右佥都御使，巡抚苏、松粮储，兼抚应天等处。会寻甸贼安铨反，改巡抚云南，甫四月而铨平。总兵沐绍勋挟世胄与中贵唐杜，表里为奸，重疏其掊克不法数十事，遂为所构。

致仕，家居视入仕之日为多，出余俸治室庐，与兄弟共居，不求分异。收族周贫，所居近城市未尝一见郡县官，在乡未尝以辞色忤人，乡人若不知有公，即相见，不信其为能忤权贵人者。